

任邱縣志卷之四

武威劉 統重修

禮樂志

政以視民刑以威民禮以節民樂以和民故曰
禮樂刑政四達而不悖則王道備禮樂刑政固
若是班乎非也劉向氏曰禮樂者所恃以爲治
也刑政者所以助治也廢所恃而獨立其所助
非所以致太平也禮樂之大者可以感神明召
瑞物使萬物得其理天地得其官故曰禮樂蟠
乎天而極乎地行乎陰陽而通乎鬼神然惟天

子體陰陽之撰建中和之極故得總攝禮樂之
大全以爲天地神人主下之至於一郡一邑其
登豆銅籩簠業笙鏞之數雖亦在所不廢然特
其小焉者耳瑣瑣似無足錄雖然百職庶尹莫
不受天子命分治神人而禮樂者人神之大司
也雖一官一邑與有責焉故於禮爲慶典爲迎
春爲耕藉爲賓興爲祭 文廟 武廟以及羣
小祀於樂爲樂器爲舞器爲樂章爲佾舞雖其
事其文爲各邑志之所公共然不敢以雷同勦
襲爲嫌而錄之必詳者蓋謹之也至於風俗之

與禮樂實相表裏任風俗舊志稱其實厚
文卽余蒞政以來詢諸父老竊聞三十年前卽
搢紳之族其衣冠屣履多不中時式今則田舍
翁多收十斛麥便思着羅縠御文綺蓋已稍稍
侈靡矣自古謂文敝救之以質又曰移風易俗
莫善於禮樂而賈誼乃謂移風易俗使天下回
心而嚮道類非俗吏所能爲嗚乎蒞斯土者慎
勿爲誼所量哉

慶典

萬壽節 冬至 元旦

先一日習儀公所敬設

龍亭於度釋寺是日五鼓文武各官朝服集丹墀下
文東武西禮生贊引班序至拜位行三跪九叩
禮禮畢各退

迎接

詔敕知縣率僚屬出郭導至縣行禮如制

迎春

先期造土牛芒神於大門外立春前一日知縣
率僚屬具儀衛農夫執耒耜前導迎春於東郊
設

勾芒神位行一跪三叩禮是日燕陳諸歌部雜戲
遂迎神至土牛所明日依立春時先於

神前行一跪三叩禮獻爵讀祝復行一跪三叩禮
遂擊鼓長官以綵仗鞭牛三農夫繼鞭出土牛

耕藉

每歲仲春吉亥日享

先農祭品帛一色白羊一豕一鉶一簋四豆四簠
二簋二爵三是日各官衣朝衣禮生引承祭官
至拜位執事者各司其事陪祭官皆就位禮生
導承祭官盥洗迎神行二跪六叩禮初獻詣

神位奠帛獻爵讀祝畢行亞獻三獻如初獻禮詣
飲福受胙位飲福受胙復位徹饌送神行二跪
六叩禮司祝捧祝司帛捧帛詣燎所各官望燎
焚訖更蟒衣詣耜田行耕耜禮耕具耒一色赤
牛一色黑箱一色青正印官秉耒佐貳執青箱
播種老農一人牽牛官右手扶犁左執鞭九推
畢農夫終畝更朝服望

闕行三跪九叩禮

今按慶典謹臣禮也天威不遠顏咫尺迎春首
歲功也布德和令於是乎在耕耜奉粢盛也致

禮祀勸農功洽百禮光邦家禮樂之大莫重於
三者故以冠集首而下以類相次焉

賓興

應試凡生員赴試者有司禮餞遣夫馬送至京
捷報凡舉人初中卽日有司樹旗送捷報牌

郊迎於送旗牌之次日遣夫馬往接旣至有司傘
蓋率金鼓清道結綵出迎行禮如常儀

釋菜至學行禮而退

赴宴至縣經天開文運坊登龍門踰昇仙橋赴鹿
鳴嘉宴以次行禮歌鹿鳴諸詩成禮而退

歸第導如來儀

會試如應試禮加隆

進士如舉人禮加隆

貢士次舉人禮

〔今按周禮大司徒以鄉三物教萬民而賓興之
此賓興之典所由昉也近世於鄉會二科邑宰
設宴餞送槩曰賓興雖在昔賓其德行後世賓
其文學而於崇德尚賢之意無古今一也在邑
人文蔚起科甲聯綿每當大比獲雋者指不勝
屈然顧名思義詎曰文藝云爾哉〕

入學

縣學額設廩膳生員二十名 增廣生員十名

每科歲二考額進生員二十五名

內有撥入左衛二名

撥入府學三四五名不等 武生二十名

凡歲科新進發紅案後知縣卜日新進衣公服謁於堂行四拜禮給花紅鼓吹導至

文廟墀下行三跪九叩禮退詣明倫堂知縣與學師交拜新進叅見學師行四拜禮知縣備筵飲宴畢新生四拜辭退

祭典

文廟歷朝祀典

漢高帝十二年詔祀

孔子以太牢諸侯王卿相至郡先謁廟而後從政

魏文帝初祀

孔子於辟雍改謚文聖尼父以顏子回配享

北魏獻文帝詔郡縣立學祀

孔子與周公並享太和中乃詔宣尼廟別敕有司享
薦

隋文帝詔國子寺每歲四仲月上丁釋奠州縣神
春仲秋釋奠

唐高祖詔立

孔子專廟太宗又詔天下州縣皆立專廟塑像出內
庭衣袞冕正南面之位

宋太宗詔

文廟立戟十六徽宗時又增門戟二十四

明洪武十四年首建大學十七年敕每月朔望祭
酒以下行釋菜禮郡禮長以下詣學行香嘉靖
九年釐正祀典始爲木主稱

至聖先師孔子

國朝順治二年定

文廟謚號稱

大成至聖先師孔子每歲仲

春秋

上丁日致祭遇有事

故改次丁或改下丁並候部文直省各府州縣

衛一體遵行

康熙二十三年

欽頒

御書萬世師表扁額雍正四年

欽頒

御書生民未有扁額乾隆三年

欽頒

御書與天地參扁額

特命國學

文廟易蓋黃瓦

康熙五十一年

聖祖仁皇帝上諭以朱子熹發明聖道軌於至正使六經之旨大明聖學之傳有繼舊在東廡先賢之列升配大成殿十哲之次

康熙五十五年江南學臣余正健疏

請宋儒范仲淹從祀奉

旨准入兩廡

雍正二年奉

旨復入從祀者二人

鄭康成 范甯

增入從祀者十有五人

諸葛亮 尹焞 陳焞 魏了翁 黃幹 何

基 王柏 趙復 吳澄 金履祥 許謙

陳澹 羅欽順 蔡清 陸隴其

乾隆三年經尚書徐元夢

請以有子若智足知聖升爲十二哲部覆奉

旨准升入殿內東旁卜子之下移朱子於西旁顯孫

子之下又奉

旨復入從祀者四賢

蘧瑗 林放 秦冉 顏何

增入從祀者六賢

縣亶 牧皮 樂正克 公都子 萬章 公

孫丑

乾隆六年頒定太學從祀諸賢諸儒並續經從

祀諸儒神位及書寫字樣東西先後位次於左

文廟四配

東配西向 復聖顏子 述聖子思子

西配東向 宗聖曾子 亞聖孟子

十二哲

東哲西向 先賢閔子損冉子耕端木子賜仲子

由卜子商有子若

西哲東向 先賢冉子雍宰子子冉子求言子偃

顓孫子師朱子熹

東廡先賢 蘧瑗舊以非弟子改祀於其鄉雍正二年復入

澹臺滅明 原憲 南宮适

商瞿 漆雕開 司馬耕

梁鱣 冉孺 伯虔